

*Lolone 18483*

DECLARATION

D V R O Y D E

NAVARRE SVR LES  
CALOMNIES PUBLIEES  
contre luy és Protestations de  
ceux de la Ligue qui se sont es-  
leuez en ce Royaume.



AVEC PRIVILEGE.

A Ortés.

M. D. L X X X V.

THE NEWBERRY  
LIBRARY

Case

F

39

. 326

1585 h2

**L**oò Rei, & Prince Soubiran de Bearn á  
permetut, & permet à Loys Rabier Im-  
primador de son Vniuersitat d'Ortés, de im-  
primar, bene, & esposar la *Declaratiõ que sa Ma-  
iestat á embiada au Rey de Francia, contre las calum-  
nias d'eus de la Ligua, ensems la Lettra que sadieta  
Maiestat escriu audiēt Seignor Rey de Francia*, com  
plus á plaà es contengut en las letras de priba-  
legi ottrogeadas audiēt Loys Rabier per sa-  
dicta Maiestat dadas á Bargerac, loò xi. de Iuin  
1545. Sageradas deu grand saged deudiēt Sei-  
gnor Rey & Prince Soubiran, signadas de  
sa maá, & contresignadas de Mazelieres, Ra-  
portadas au Conseil deudiēt Seignor Rey per  
Mr. Me. Ioan deu Breuil Conseiller audiēt  
Conseil loó xiiij. deudiēt mes de Iuin 1585.  
A Pau.

## A V R O Y.



ONSEIGNEUR, vostre Maïesté aura  
 veu comme ceux qui se sont n'agueres ele-  
 uez en ce Royaume m'ont pris à partie en  
 leurs Protestations, & par toutes sortes  
 de calomnies ont tasché en icelles de me rendre suspect  
 à vostre Majesté, odieux à tous les Ordres & Estats,  
 & en mauuaise odeur enuers tous les Princes & Na-  
 tions de la Chrestienté. C'est pourquoy, Monseigneur,  
 j'ay pensé de vous enuoyer la Declaration escrite &  
 signee de ma main, qui vous sera presentee par les  
 Sieurs de Cleruant & de Chastincourt: Laquelle ie  
 supplie tres-humblement vostre Majesté vouloir lire  
 de point en point, & en icelle se représenter deuant  
 les yeux mes actions, & deportemens passez, esquels  
 ie m'assure que l'œil equitable de vostre Majesté ne re-  
 marquera que fidelité & integrité. Nul, Monseigneur,  
 ne l'a veu plus profondement, ny plus clairement, soit  
 aux causes, soit aux effects, que vostre Majesté. Et  
 pourtant, encore que ie desire sur tout satisfaire à vo-  
 stre iugement, si me confie-ie que ce m'est chose fort  
 aisee en l'endroiect de vostre Majesté. Mais parce, Mon-  
 seigneur, que le venin de ces calomnies se va respan-  
 dant par toutes les veines de ce Royaume, & mesmes  
 de la Chrestienté, entant qu'ils peuuent; en quoy mon  
 honneur & reputation souffrent un interest incroya-  
 ble: j'ay à supplier tres-humblement vostre Majesté,  
 de me faire tant de faueur, que de trouver bon que j'en-  
 uoye la susdite Declaration à toutes vos Cours de Par-  
 lement, & autres corps notables de ce Royaume: vers

lesquels principalement ils ont tasché de me denigrer  
& diffamer. Aussi que vostre Maiesté me face cest  
honneur de commander à vos Ambassadeurs de la  
presenter à tous Princes Chrestiens vos amis & alliez,  
avec les lettres, que souz le congé de vostre Maiesté, ie  
me delibere leur escrire. M'assurant que vostre Ma-  
iesté ne pourra trouuer que tres-estrange ( luy estant  
ce que ie suis, & avec le courage que r'ay ) que ie passe  
souz silence les enormes blasmes dont ils chargent  
mon honneur, que i'oseray dire ne pouuoir estre taché  
sans quelque intérêt de vostre Maiesté. le l'ex supplie  
donc tres-humblement & de toute mon affection . Et  
remettant le surplus sur lesdits Sieurs de Cleruant &  
de Chastincourt, ie suppliray tres-humblement vostre  
Maiesté les croire.

Vostre tres-humbl: & tres-obeissant  
subiect & seruiteur

H E N R Y.



DECLARATION DV ROY  
DE NAVARRE SVR LES CA-  
*lornies publiees contre luy és Protestations de ceux  
de la Ligue qui se sont esleue en ce Royaume.*

**L**E Roy de Nauarre, ayant veu les Protestations & Declarations de ceux qui troublét aujourd'huy l'Estat de ce Royaume, sous le nom de Ligue sainte, esquelles ils veulent couvrir leur mauuaise intention partie de zele de Religion, & partie de l'affection du bien public; Mais particulièrement le prennent directemēt à partie, comme heretique, relaps, persecuteur de l'Eglise, perturbateur de l'Estat, ennemy juré de tous les Catholiques, &c. A estimé estre de son deuoir d'esclaircir tous Rois, Princes, Estats & Nations de la Chrestienté contre ces calónies: Mais specialement le Roy son souuerain Seigneur, & le Peuple de ce Royaume de tous estats & qualitez: puis qu'ainsi est qu'à l'ombre de lui ils ne font point de conscience d'attenter à la Couronne de son Prince, & confondre miserablement tout son Estat.

DECLARE donc premierement en ce qui concerne la Religion, ledit Sieur Roy de Nauarre, deuant Dieu, qui voit le fonds de son cœur, deuant le Roy son souuerain Sei-



gneur auquel il desire principalemēt approu-  
 uer ses actions, deuant tous les dessusdits Prin-  
 ces & Natiōs, qu'il en fera volōtiers tesmoins  
 & iuges : Qu'il n'espere son salut qu'en la foi  
 & Religion Chrestienne, qu'il embrasse de tou-  
 te son affection, & pour reigle infailible, de  
 laquelle il reçoit la parole contenuë au vieil  
 & nouveau Testamēt, qu'il a pleu à Dieu lais-  
 ser en ces tenebres pour luminaire & directiō  
 de son Eglise: Qu'il croit vne Eglise Catho-  
 lique, Apostolique, pour la conseruation & re-  
 stauratiō de laquelle en toutes sortes de gra-  
 ces il prie Dieu iournellement, & s'estimerait  
 tres-heureux d'espandre son sang en la defen-  
 dant contre les infideles: Qu'il croit & reçoit  
 les Symboles ou Abregez de la foi Chrestien-  
 ne, qui ont esté dressez par icelle Eglise Catho-  
 lique, Apostolique, pour seruir de marques,  
 par lesquelles les Chrestiens & Orthodoxes  
 fussent discernés de tous mal sentans de la foi  
 & heretiques: cōme aussi il embrasse les plus  
 anciens, celebres, & legitimes Conciles, qui  
 ont esté tenus cōtre eux : Anathematise de bō  
 cœur toutes les doctrines par eux cōdamnees;  
 & est prest, & sera tousiours, pour la reuerence  
 qu'il rend à l'Eglise, de subir son iugement, &  
 & acquiescer à son arrest, quand elle sera bien  
 assemblee en vn legitime & saint Concile.

Quant au differend dōt est aujourd'hui que-  
 stiō en l'Eglise, desire ledit Sieur Roy de Na-  
 uarre, qu'il soit cōsideré qu'il n'est le seul, ny le  
 premier qui se soit plaint des abus introduits

en icelle, & qui en a requis la reformation; & pourtant qu'il seroit trop dur, que ce desir vraiment Chrestien de voir l'Eglise repurgee, lui fust imputé à heresie ou inimitié contre l'Eglise: Que c'est vne plainte cōmune depuis cinq cens ans & plus, de tous les Princes, de tous les Doctes, & tous les saints personnages: que l'Eglise par ce long espace de temps auoit beaucoup perdu de ceste premiere pureté & sincerité, estant icelle composee d'hommes, qui sans doute y apportent tousiours de l'homme quant & eux: q̄ c'est la voix de tous les Cōciles, sans nul excepter qui ont esté tenus depuis le susdit tēps, que l'Eglise auoit besoin de reformation; auoiēt aspiré & soupiré les plus gens de bien en chasque siecle, de la bouche desquels ne seroit iamais sortie ceste sentence, Que qui dit q̄ l'Eglise a besoin de repurgation, deust estre tenu pour heretique ou ennemi d'icelle: q̄ les Roys tres-Chrestiens recognoissans tres-bien cela, auroient souuent pour cest effect estimé estre de leur charge & de l'acquit de leurs consciences, d'exhorter le Pape & les Princes Chrestiens à vn Concile general, lequel au deffaut & en cas de conuience d'icelui, ils auroient bien sceu conuoquer de leur autorité: d'où seroient sorties sous leurs nōs mesmes plusieurs tres-louables Ordonnances pour la reformatiō de l'Eglise Gallicane; qu'en fin apres vne longue querimonie de plusieurs siecles, n'y mettans la main ceux ausquels il sembloit appartenir; ains s'occupans plustost,

cōme chacun ſçait, aux negociations du monde, ſeroit aduenue que pluſieurs Princes, Peuples, & Eſtats peſans avec vn grand ſoin les raiſons qui leur eſtoient alleguees, & les voyas ſouſtenues par la conſtance d'infinies perſonnes de toutes qualitez, és plus grands tourmēs iuſques à la mort; auroient remis la ſuſdite reformation en vn Concile legitime, & au refus d'icelle auroient proteſté des abus qu'ils pretendent en l'Egliſe: & y auroient eux-mêmes mis la main, dont ſeroit ſorty le ſchiſme, que ledit Seigneur Roy de Nauarre deplore au iourd huy en l'Egliſe Chreſtienne; & auquel certes depuis tant de temps il n'eſtoit impoſſible de trouuer remede, ſi l'honneur de Dieu, & le ſalut des hōmes nous euſt touché d'auffi pres, que noſtre gloire ou noſtre intereſt particulier.

DIT pour ſon regard ledit Sieur Roy de Nauarre, qu'il ſeroit non ſeulement nay pendant ce ſchiſme aduenue en l'Egliſe Chreſtienne, duquel il eſtime la continuation deuoir eſtre imputee à ceux qui n'ont point cherché les moyens de reuſſir l'Egliſe, comme ils deuoient: mais mêmes auroit eſté eſleué en France pendant l'exercice des deux Religions, permis par le Roy és Eſtats generaux de ſon Royaume, & depuis confirmé par pluſieurs Edicts de ſa Maieſté: Qu'il auroit eſté nourry & inſtruit de ſes premiers ans en ceſte creance, qu'il y auoit des abus en la doctrine de l'Egliſe Romaine, qui auoient beſoin de reformatiō: & s'eſt depuis en icelle



icelle fortifié tant par la conuersation de plusieurs personnes doctes, que par la lecture des saintes Escritures: Qu'il croit en son cœur, & & confesse franchement de bouche, qu'il est tres-persuadé que la verité est de sa part. Qui auroit esté cause qu'il auroit encouru beaucoup de perils & ruines, plustost que s'en departir: mesme à ceste occasion, & à son grand regret, n'auroit eu moyen de faire tant de seruices, ny aussi participé à la bonne grace de son Prince souuerain, que sans doubte il eust peu faire, si en saine conscience il eust peu accommoder à mesme profession que luy. Ce nonobstant pour faire cognoistre à tous, que ce qu'il en faict n'a esté par obstination, ains par constance, & non par ambition, mais par le seul desir de son salut: Il supplie tres-humblement sa Majesté de faire tenir vn Concile libre & legitime, selon qu'il auoit tousiours esté promis par les Edicts. étant ledict Sieur. Roy de Nauarre tout prest & resolu de receuoir instruction par iceluy, & reigler sa cœnece par ce qui y sera décidé sur les differents de la Religion.

Et ne faut s'arrester au Concile de Trante; car encores que la continuation d'iceluy eust esté longuement poursuiue par le feu roy Charles, & en fin obtenue du Pape Paul tiers; & apres la publication enuoié Ambassadeurs par sa Majesté audict Concile, avec instructions Chrestiennes, Catholiques, conformes aux saintes Decrets de l'Eglise romai-

ne & approuuees par la Sorbonne, & par les Docteurs d'icelle, enuoyez audit Concile avec lesdits Ambassadeurs : toutesfois quelque diligence qu'ils peussent faire enuers les Cardinaux, Legats, Presidens audit Concile, l'espace de dixhuit mois & plus, ne fut possible de rien obtenir conforme ausdites instructions, ny de reformer l'ordre Ecclesiastique suiuant icelles : dont aduertie sadite Majesté, & cognoissant le mal qui en pourroit aduenir, commanda à sesdits Ambassadeurs de protester contre ledit Concile, & la Protestation faicte s'en reuenir; ce qu'ils firent. Er quelque poursuite & requisition qu'il leur aye esté depuis faicte par le Pape & lesdits Cardinaux, & le feu Cardinal de Lorraine, pour retourner audit Concile, & y demeurer iusques à la fin d'icelui, ils ne voulurent iamais : tellement que ledit Concile fut continué, fini, & conclu sans eux, & sans estre par eux signé, suiuant la coustume de tout temps. Dont est aussi aduenu que quelque instante poursuite, qui aye esté faicte pour recevoir & publier ledict Concile en la Cour de Parlement à Paris: ladite Cour, Chambres assemblees, l'a tousiours empesché; mesmes l'an soixante & douze, apres la Saint Barthelemy, lors que le temps sembloit grandement fauoriser ladite poursuite.

N e pense donc ledit Sieur Roy de Nauarre qu'il puisse estre tenu de gens de iugement

pour heretique ou pertinax; puis que la matiere est indecize, & qu'il se soubmet à vn Concile: aussi peu que pour plaideur & pour iniuste, qui attend l'arrest d'un Parlement, quoi que puisse cauiller l'Aduocat d'une partie: ny pareillement pour schismatique, ou contumax, puis qu'il rend ceste obeissance & reuerence à l'Assemblée del'Eglise, d'estre prest d'y comparoistre, d'y rendre raison, & d'y apprendre; mesmes de changer en mieux, quand le mieux lui sera enseigné: Se plaint au cōtraire que iusques icy il a veu par longues annees tous ces zelateurs assemblez pour le destruire, mais nul pour l'instruire: Se plaint d'un proces commencé par l'execution, d'une remonstrance commencee par anatheme, sans aucune des formalitez requises & prealables: Protestant deuant tous Princes & Estats, & sur tout deuant le Roy son souuerain, auquel il s'adresse pour Iustice; & deuant l'Estat de ce Royaume, auquel il veut représenter ses actions, contre les auteurs & fauteurs de ceste Ligue, de si manifeste violence, precipitation, & iniustice.

D I T ledit Sieur Roy de Nauarre, qu'aussi peu lui peut conuenir le nom & blasme de relaps, en vertu duquel, ores mesmes que par vn Concile il acquiesçast à changer d'opinion, ils pretendent le priuer de la succession de la Couronne, à laquelle pleust à Dieu qu'ils pensassent aussi peu que lui: & par là il laisse à

penſer à vn chacun de quelle charité ils y procedent, & quel doit eſtre leur deſſein de lui retrancher, entant qu'ils peuuent le deſir de ſe faire inſtruire en vn Concile, ſans entrer au fonds qui ſe pourroit renuerſer, & par les Canons, & par exemples. Relaps nomment ils en leurs langages, ceux qui aians eſté heretiques, & abiuré leur heresie, y ſont recheus apres. Ainſi donc n'ayant par les anciens Canons (cōme cy deſſus a eſté veu) ledit Roy de Nauarre eſté heretique: il ſe fait tout clair auſſi qu'il ne peut eſtre relaps. Dit plus, que quand il auroit eſté ou ſeroit heretique, auſſi peu pourroit il eſtre relaps, veu qu'il n'a iamais eſté conuerti de la pretendue heresie; & veu meſmes que nul n'a iamais penſé à prendre la peine, ou cherché les moiens de le reunir & conuertir, ains ces zelateurs n'ont eu autre but par tous leurs effectſ & leurs efforts, que le ſubuertir & ruiner.

N'alleguent ici, que ledit Seigneur Roy de Nauarre, apres la S. Barthelemi enuoia deuers le Pape, & ſe rengea à la Meſſe. Laiſſant l'aage à part, chacun ſçait aſſez quelle eſpece de conuerſion ce fut, & ſ'il auoit ſubiet de juſte crainte: & plus longue refutation ſeroit friuole. Tant y a que ſi nos actions par toutes les Loix ſont eſtimees nulles, quād elles ont procedé ou de crainte ou de force: il eſt tres certain que iamais action n'eut moins de volonté; iamais action n'eut plus de force. Tant y a auſſi, qu'il n'eut pas ſi toſt reconuert ſa volōté,



qu'il fit aparoir quelle elle estoit par professiō publique, mesme au milieu des Catholiques qui l'accēpaignoient, & sembloient le posseder alors, sans dissimuler, sans tergiuerfer; dont peut apparoir son erreur du tout esloigné d'hypocrisie.

SUPPLIE tres-humblement ledit Seigneur Roy de Nauarre, le Roy son Seigneur, qu'il luy plaise trouuer bon qu'en toute modestie il responde aussi au blasme qu'on luy impose de Persecuteur de l'Eglise Catholique; & sur ce poinct il somme les consciences de ses plus grands ennemis de respondre deuant Dieu, si ce tiltre luy pourroit en rien appartenir. Chacun considere icy que les guerres ciuiles sont tombees sur les plus tendres ans dudit Seignr Roy de Nauarre, & s'il y a apparence aucune qu'il eust entrepris vne guerre de gaieté de cœur pour persecuter les Catholiques, lesquels chacun sçait le nombre, l'autorité, & la force en ce Royaume totalement hors & à couuert de persecution; lesquels mesmes couuerts du seul nō du Roy, estoient à l'abbry pour son regard, & de tout ce qui depend de luy, de tous attentats, entreprises, & iniures. Et de fait on a bien ouy parler en France des rigueurs & persecutions es ans passez; mais nul ne l'a iamais interpreté que passiuement au regard de ceux de la Religion, & actiuement au regard des autres: & vser autrement du mot, seroit si improprement parler, qu'il ne seroit entendu d'aucun.

IL pleut au Roy Charles le faire venir en Cour, & l'honorer du mariage de sa sœur. Il y vint en la Religion en laquelle il estoit nay & nourri: Et ce qui suiuit, vaut mieux oublié que ramentu. Comme il sort delà, il se retire en ses terres. La paix se faisant avec feu Monseigneur, il ne fit instance d'un seul mot pour soi, & ne s'y lit point vn Article qui le touche: quoi qu'il eust plus d'occasion sans doubte que nul autre, ou d'estre animé des traitemens passez, ou d'estre comme recompensé des pertes souffertes; ne voulant ledit Seigneur Roy de Nauarre retarder le repos de ce Roiaume, & le soulagement du peuple d'un seul iour à son occasion. Si sçait on que s'il eust voulu, il estoit en sa main de se seruir de l'armée des Reystrs qui s'esbranloit à toute heure, à faute d'estre payez du Roy, selon les Articles de la paix, pour retourner teste vers Paris.

A v contre, ce fut deslors que les Chefs de ceste Ligue, abusans de sa bonté, trouuerent ceste Ligue pretendue Saincte, contre l'Edit du Roy freschement publié, par laquelle ils iuroient en termes expres l'exterminatiō totale de ceux de la Religion, sans exception ny acception de personnes, sans respect ny esgard d'alliance, affinité, proximité, consanguinité, fraternité. Ceux qui y estoient entrez sans sçauoir le fonds, s'en retirerent aussi tost qu'ils le cogneurent. Et pour son particulier, furent alors descouuerts les Memoires \* qui s'effectuent auourd'hui, concludans sa mort, & de Monseigneur le Prince son cousin,

& de tout leur sang: pour se faire voie plus aisément, comme il est porté expressement, à l'inuasion de ce Roiaume. Iugent icy tous hommes, qui estoit alors l'agent, ou le patient; le persecuteur, ou le persecuté.

De là donc vint à renaistre la guerre ciuile de l'an cinq cens soixante dixsept, eux aians induit l'Assemblée de Blois à l'exécution de leur dessein: auquel ce eust esté contre nature, si ledit Sieur Roy de Nauarre, ou ceux qui faisoient mesme profession, n'eussent fait deuoir de resister: il y alloit de sa persône & de sa vie, il y alloit de sa conscience & de son honneur; il y alloit, cōme on voit aujourd'hui, du Roiaume ou de l'Estat. Le mal que le Roy n'a recogneu qu'en fleur, ne se le pouuant imaginer de la part de ceux qui tenoient leur bié de lui, & le Roy de Nauarre l'auoit recogneu: mesmes au contraire c'eust esté trahir soi-mesme, estre destructeur de cest Estat, & se rendre à leurs desirs, au lieu de s'y opposer.

Cependant, quoi que les cruelles elausés de la coniuration fussent assez suffisantes pour tourner à coup en fureur sa patience, en vengeance la douceur & de bonnairété qui est naturelle à ceux de sa maison: quoy que mesmes il vist accourir à luy de toutes parts ceux de sa Religion, poursuiuis par la rigueur, ou remis au choix de sortir du Royaume, ou renoncer à leur Religion: Si ne voulut toutesfois ledict Sieur Roy de Nauarre és villes où il eut de la puissance, vser

de mesme façon enuers les Catholiques, non mesmes enuers les Moines & le Clergé, qui pouuoient veritablemēt estre suspects & def-favoriser ses executions Au contraire, sçauent ceux d'Agē (il allegue cest exemple, parce que c'estoit sa residence, & que ceste ville Episcopale a quelque nom) que les Catholiques n'y souffrirent iamais mauuais traictement en leurs personnes ou biens, ni discontinuation au faict de leur Religion: Que le Clergé vacquoit au seruice acoustumé: Que les Moines preschoient librement en la plus forte ardeur desdits troubles: Qu'il se contenta que ceux de sa Religion, pour ne les troubler en rien, fissent leurs presches en maisons priuées & d'emprunt: Que pour subuenir aux necessitez de sa defence, il prenoit sans plus les Decimes que le Roy souloit leuer sur le Clergé, tous ses patrimoines lui estans saisis de toutes parts: & de ce eusse peu tesmoigner Monseigneur le Duc de Montpésier Prince tres-affectionné à la Religion Romaine, comme vn chacun sçait: comme aussi en tesmoigneront Monsieur le Mareschal de Biron, Monsieur l'Archeuesque de Vienne, Monsieur de Villeroy Secretaire d'Estat de sa Maiesté, & plusieurs autres qui l'ont veu sur les lieux.

E r ne fut si tost accordé la liberté de la conscience, bien qu'avec tres-grandes restrictions, au regard de l'Edict precedent, qu'il ne fust tout prest de poser les armes sans délai, qu'il



qu'il pouuoit continuer, comme ſçait tresbien ſa Maieſté, avec plus de forces & de moyens par le notable ſecours qu'il auoit negocié des Princes de meſme Religion; ſi auant, qu'une forte armee eſtrangere eſtoit ſur le point d'entrer en ce Royaume: mais il ſ'eſtima heureux d'en pouuoir ſortir, ſans qu'à ceſte occaſion le pauvre peuple euſt à ſouffrir d'auantage, ayant mieux empiter ſa condition, en le ſoulagant du mal prochain, que de l'amender à ſon dommage. Prie donc ledit Sieur Roy de Nauarre vn chacun de prononcer librement, ſi par ſes deportemens il a en rien mérité le nom qu'ils luy donnent de Perſecuteur, celui qui ne ſ'eſt pas peu reſoudre à leur laiſſer exécuter leurs barbares exécutions & ſanglans deſſeins contre luy de prime face; mais en conſequence contre le Roy-meſme, & ſon Eſtat.

Es pays eſquels, par la grace de Dieu, ledit Sieur Roy de Nauarre a puiffance ſouueraine, il penſe auſſi peu auoir acquis ce blaſme vers qui aura bien cogneu & la nature des choſes, & la ſuite de tous ſes deportemens: & de faict en tout ce qui luy reſte du Roiaume de Nauarre, ayant trouué l'exercice de la Religion Catholique Romaine à ſon aduenement, il n'y a rien alteré ny innoué, tellement que le ſeruiſſe d'icelle y eſt par tout, l'exercice de la Religion reformee n'y eſtant qu'en deux lieux ſeulement.

Et quant au pays de Bearn, qui n'eſt point ſi grand, la Royne ſa mere en vne Aſſemblée

generale des Estats y ayant estably ladite Religion de laquelle elle faisoit professiō, sans que sur ce changement fust ensuiuie plainte ausdits Estats, plusieurs ans depuis qu'il y a continué ce mesme Estat, comme il a declaré librement, ayant tousiours estimé qu'un Prince bien conseillé ne doit sans necessité ou euidēte vtilité introduire un changement en son Estat. Et là où l'vtilité ou la necessité mesme y est, que ce changemēt doit estre fait par la mesme voie par laquelle l'ordonnance a esté faite. Or auoit il veu qu'apres la saint Barthelemy, comme il eust ployé sous la force au faict de la Religio, & enuoié aux susdits pays de Bearn pour Gouverneur & Lieutenant general le Sieur de Mi-eussent, que chacun cognoist pour Catholique, avec charge expresse d'y remettre la Religion Catholique Romaine; nonobstant le desespoir des affaires de la Religion en France, nonobstant la profession contraire de luy-mesme qui pouuoit seruir d'exemple, nonobstant l'authorité d'un gouverneur par luy expresse enuoyé, ils s'estoient tous resolus à persueuer en leur Religion, & à maintenir la forme de leur Estat, sans y receuoir cedit changement. Pensa donc ledit Sieur Roy de Nauarre, & iuge un chacun si à bon droit, que c'estoit à ses Estats une resolutiō fixe & formee, puis que la necessité; & mesme telle necessité, qui donna la Loy à toutes Loix, ne les en auoit peu desmouuoir aucunement: Comme aussi de fait aux assemblees d'Estats, qui se tiennent d'an en an en

fondit pais de Bearn, n'est iamais comparu  
 personne qui aye requis le changement, enco-  
 res que la liberté y soit telle qu'on cognoist, de  
 proposer iusques au moindre grief qu'on pre-  
 tend recevoir du Prince, & en requerir la repa-  
 ration : dont appert que ce n'est qu'une prati-  
 que du dehors de ceux qui enuient le repos de  
 ses subiets, & non un desir interieur d'eux.  
 Et n'a laissé pourtāt ledit Sieur Roy de Nauar-  
 re de faire tousiours paier les pensios des Pre-  
 lats & autres Ecclesiastiques de fondit pays,  
 dont il ne prend autres tesmoins qu'eux mes-  
 mes, & le plus souuent de ses propres deniers,  
 comme scauēt les Euesques d'Acqs & Olerō,  
 & autres. Qui plus est de son propre mouue-  
 ment, pour contenter ceux de ses subiets qui  
 pouuoient continuer en la Religion Catho-  
 lique Romaine, modera les Ordōnances de la  
 feuē Roine sa mere pour le fait de la Religiō,  
 qui n'estoient qu'amendes pecunieres fort le-  
 geres. Tant s'en faut que iamais on y aye pro-  
 cedē cōtre les Catholiques par bannissemēts,  
 punitiōs corporelles, morts, bruslemens, tour-  
 mens, recherches; tels qu'ont conseillé, prati-  
 qué, & introduit ceux qui aujour'd'hui se di-  
 sent protecteurs de la Religiō Catholique Ro-  
 maine, cōtre ceux de la Religion contraire. Et  
 de ce soiēt tesmoins les Catholiques de Bearn  
 qui y vivent en toute paix & tranquillité, &  
 desquels plusieurs exercēt offices notables ou  
 audit pays; ou pres de la personne dudit Sieur

Roy de Nauarre, & qui mesmes ont les premières charges en ses gardes, & les Capitaines de ses meilleures maisons : Ce que certes il ne est apparent qu'il voulust faire, s'il les auoit mal traitez, ou s'il leur gardoit vn mauuais cœur à l'aduenir.

Or par ce que dessus seroit assez respondu à ce qu'ils dient, qu'il est ennemi iuré des Catholiques. Mais ledit Sieur Roy de Nauarre qui voudroit ouurir son cœur à tout le monde, ne s'ennuiera point de leur descouurir ses affectiōs & actiōs. Declare donc ledit Sieur Roy de Nauarre qu'il recognoist & croit, à tousiours creu & recogneu, que pourueu que le fonds de bonne conscience y soit, la diuersité de Religiō n'empesche point qu'un bon Prince ne puisse tirer tresbon seruice indifferement de ses subiets, & que les subiets ne rendent reciproquement le deuoir qu'ils doiuent soit à leurs superieurs, soit à leurs Princes: estât euident que les deux Religiōs recommandent egalement, selon la parole de Dieu, le deuoir du subiet enuers son Prince, & de l'inferieur vers son superieur. Et pourtant s'est tousiours attendu ledit Sieur Roy de Nauarre de n'estre moins fidelemēt serui des vns que des autres; comme aussi de fait en la distributiō des charges de sa maison, chacun sçait assez qu'il les y en a tousiours indifferemmēt pourueus. Sçait aussi ledit Sieur Roy de Nauarre qu'il est bien aimé & bien serui des Gentils-hommes Catholiques, & autres personnes de toutes quali-



tez qu'il a retirez à s<sup>on</sup> seruice, comme de leur part ils recognoistr<sup>ont</sup> tous volontiers qu'il les à aimez sans exception de religion:& selon la proportion de ses moiens, leur a departi des biens & h<sup>on</sup>eurs aussi largement,& plus mesme au t<sup>em</sup>ps de la guerre, qu'à ceux qui faisoient mesme profession que lui. Et s<sup>ç</sup>auent aussi les Seigneurs & Gentils hommes & tous autres Catholiques, que durant les troubles il les a espargnez tant qu'il a peu en leurs biens & maisons, sans iamais auoir souffert que contre eux ait est<sup>é</sup> exercé aucune rigueur de guerre, mesmes contre ses vassaux armez contre luy, & qui se trouuoient à la ruine & demolition de ses propres maisons, lesquels (la guerre finie) le venans trouuer y ont est<sup>é</sup> tous les bien venus, sans iamais leur en auoir ou tenu propos fascheux, ou fait vn mauuais visage: tant s'en faut que selon les diuers moiens que le Seigneur a sur son vassal, il ait pratiqué contre eux ou directement, ou indirectem<sup>ent</sup> vne seule espece d'animosité ou de végeance: comme aussi s'ose promettre de ses actions ledit Sieur Roy de Nauarre, que les Catholiques qui ont voulu s'approcher de luy, en seront partis cōtans, & n'auront rien remarqué dont ils puissent presumer, qu'une naturelle affectiō d'embrasser tous les seruiteurs & subiects du Roy, de quelque Religion qu'ils soient, de mesme forte; se promettant de leur part ceste mesme bien-vueillance qu'ils ont tousiours demōstré enuers les siens.

Les dessusdits effects qu'il a de tout tēps & iusques à present continuez, pense ledit Sieur roi de Nauarre auoir prou de poix pour emporter les paroles que ses ennemis publient contre luy. Or ont ils dict neantmoins que ledit Seigneur Roy de Nauarre auoit enuoié en Angleterre & en Alemagne brasser vne ligue à la ruine & confusion de tous les Catholiques, preuoiant la mort du Roy, aduenant laquelle il se preparoit à la mutation de la Religio &c. vouloit enuahir les biens du Clergé, vouloit confisquer ceux de la Noblesse qui n'adhéroient à son intention : Et sur ce subiet ont semé par tout, mesmes fait lire és sermons en plaine chaire certain Concordat de l'an mil cinq cens quatre vingts & quatre, en datte du xiiij. Decēbre, resulté d'vne Assemblée qu'ils disent tenue à l'instance dudit Seigneur Roy de Nauarre à Magdebourg: que pareillement à l'Assemblée tenue à Montauban, il auroit promis & iuré d'abolir, aduenant la mort du Roy, la Religion Catholique Romaine, la despouillant de ses biés, & priuant ceux qui en feroiēt profession de tous estats & dignitez : & icy se verra euidemment comme toute calomnie de sa nature se descouure & refute d'elle mesme.

**PROTESTE** donc premierement ledict Seigneur Roy de Nauarre deuant Dieu & en sa conscience, qu'il desire & souhaite de tout son cœur longue & heureuse vie au Roy son souuerain Seigneur, ne lui estant iamais entré en opinion de bastir dessein ny sur sa mort ny

apres sa mort : lesquels il estimeroit non seulement crime de leze Majesté, ne pouuant iceux proceder que d'un desir miserable de la mort de son Prince, qui seroit suiui de prompt effect si la puissances y estoit, mais mesme seroit crime en quelque façon, contre nature & contre les sens communs, estant sa Majesté, graces à Dieu, en la force de son aage, & plain de santé; & leur aage au demeurant de si peu different, qu'il seroit ridicule pour la difference de deux ans ou enuiron, de prendre tel aduantage l'un sur l'autre. Tant s'en faut que (comme ont fait les Chefs de la Ligue) il luy soit iamais monté au cœur de cōdamner le Roy à mort prochaine, en preuoyant les consequences de sa mort trente ou quarante ans pour le moins, comme il espere premier qu'il en soit besoin, & sous le pretexte de pouruoir aux affaires du Royaume, & cependant le mettre en vne confusion tres-deplorable. Tant s'en faut aussi, que par publique Declaratiō il'ait prononcé & preiugé steriles le Roy & la Roynne sa femme en la fleur & force de leurs ans, cōme ils ont faict: Chose qui ne fut iamais pratiquée es Estats de Chrestienté, chose que les Estats d'Angleterre n'ont pas voulu requerir de la Roine d'Angleterre, non encor mariee; se reposans tant sur sa prudence, que celle qui les a regis en paix durāt sa vie, la voudra laisser en heritage à leur posterité. Bref, qu'il ait requis le Roi son souuerain Seignr de le declarer, ce que naturellement & legitimemēt il est, ou d'en dōner quelq̃ marque

soit par quelque accroissement ou aduantage, cōme les dessusdits l'ont entrepris, qui lui ont armé Monsieur le Cardinal de Bourbon, Prince aagé de soixāte six ans, Prince hors d'espoir & de mariage & de posterité, pour estre son heritier ; comme si le Roy n'auoit plus, qu'un an ou deux à viure, pour luy susciter semence ; comme si d'un vieil estoc de celibat nous deuoit plustost sortir lignee, que d'un mariage vigoureux & florissant de sa Maiesté. Comme ainsi fust toutesfois que ledit Seigneur Roy de Nauarre ne peust ignorer les desseins que les susdits proiettoiet de long tēps contre lui, les pratiques qu'ils faisoient dedans les villes, les menees qu'ils tramoient en Italie & en Espagne, de l'exclure, aduenant la mort du Roy, du droit de succession en ce Royaume ; lequel il espere que Dieu luy fera la grace, dōnant lōgue vie au Roy, de n'auoir subiet de cōtester. S'assurant aussi, que ce que le droit & la nature lui voudroient dōner d'ailleurs, par toutes leurs Liges & leurs brigues ils ne pourroient empescher de l'obtenir.

Reconnoist franchement ledit Seigneur Roy de Nauarre que long temps a, il se seroit apperceu des desseins des susdits cōtre le Roy & son Estat ; & supplie tres humblement sa Maiesté de se ressouuenir des Aduertissemens qu'il lui en auroit dōnez des l'an soixāte seize, lui ayāt enuoyé certain Memoire par un Gentilhomme expres, qui aujourd'huy s'en eectuēt de poinct en poinct, & deslors commencerent à se fonder sous le nom de Cōfrairie & Ligue



sainte . Que tost apres la paix de l'an M. D.  
L x x v I I. il en auoit veu hausser le bastiment  
par les remuemens qu'ils faisoient entre les  
Estats suscitez en diuerſes Prouinces cõtre le  
seruice de sa Maieſté; si auant, qu'ils y auroient  
voulu attirer ceux mesmes de la Religion, &  
auoient traicté avec le tres-illustre Prince Ca-  
zimir Comte Palatin du Rhin. Et lequel, aiant  
veu au fonds de leurs desseins (comme il le re-  
cognoistra tousiours) qu'ils pretendoient à  
l'Estat, pour l'honneur & amitié que les siens  
auroient de tout temps porté à la maison de  
France, n'y auroit voulu entendre plus auant.  
Que depuis, comme leurs affaires s'achemi-  
noient pas à pas, auroit aussi descouuert les  
traictés qu'ils auoient en Italie & en Espagne,  
les deniers qu'ils en tiroient, les propositions  
qu'ils y faisoient, les responses qui leur estoient  
faites sur icelles : lesquelles sa Maieſté, ne pou-  
uant en son esprit conceuoir d'autrui si gran-  
de ingratitude & perfidie, auroit fait difficulté  
de croire; & desquelles toutesfois ledict Sei-  
gneur Roy de Nauarre (comme d'une ruine  
à lui toute cognue) attendoit l'esclat de iour  
en iour. Qu'il se souuenoit de la prinſe & exe-  
cution de Salcede, qui auroit deposé grande  
partie de ce qu'on voit aujourd'hui, qu'on au-  
roit tasché d'obscurcir pour lors par artifices.  
Mais dont estoit demeuré certain au cœur de  
tous vrais subiects; Que feu Monſeigneur n'e-  
auoit pas aduertí le Roy sans fondemét: Que  
le Roy aussi, s'il n'eust esté criminel que des

crimes ordinaires, n'eust pas prins la peine de l'enuoyer querir aux pays Bas par deux personnages des premiers de son conseil d'Estat, & n'eust pas voulu aussi estre present à ses interrogatoires & recolemens &c. dont s'ensuiuit que par Arrest de la Cour de Parlement de Paris il fut tiré à quatre cheuaux, comme traistre au Roy & à la Frâce. Que par leurs Memoires precedents & par leurs Confrairies qu'ils redreissoient de nouueau en la pluspart des bonnes villes de ce Roiaume, apparoiſſoit assez de leur pretexte, qui seroit d'exterminer la Religion de laquelle il fait profession, & lui-mesme particulièrement, si en eux estoit; tellemēt que le premier coup de leur tonnerre auroit afondré sur lui, si tant estoit qu'entre cy & là sa Maieſté ne recogneust la fin de leur pratique. Et que pour ceste occasion, voiant que sa Maieſté n'y auoit donné autre ordre, preuoiait ledit Pretexte, qu'ils prendroient d'extirper tous ceux de la Religion, il auroit esté induit de penser à ses affaires. Et pource auroit sur la fin de l'an mil cinq cens quatre vingts trois depesché vers la Roine d'Angleterre, le Roy de Dānemarc, les Princes Electeurs d'Allemagne, le Landgraue de Hess, & autres Princes & États, le Sieur de Segur Pardillan, Superintendant de sa maison: Premièrement, pour les exhorter à chercher les moyens de cōposer tous les differents en la Religion, qui restoient entre les Eglises reformees, desquels on abusoit à leur ruine commune. Secondemēt, pour re-

renoueler & affermer vne bõne amitié avec eux : & sans toutesfois les requérir ny employer plus auant . Tiercement, pour depõser en Allemagne vne bonne somme de deniers, laquelle au besoing lui peust ramener vn bon secours cõtre ses ennemis. Tous les susdits Rois, Princes, & Estats alliez estroitement de la Couronne de France, vers lesquels le Roy a ses Ambassadeurs, & avec lesquels ledit Sieur de Segur auoit charge de communiquer, & communiquoit de fois à autre, qu'il print pour tesmoins de ses faits & dits, de ses propositions, negociations, & conclusions; cõme depuis son retour il a supplié tres humblement sa Maiesté de lui faire cest hõneur de leur commander de s'informer diligemment de toute sa legation : s'assurant que plus clair ils y verroient, & plus ils recognoistroient son cœur François, sa sincere affection, & sa vraie fidelité enuers sa personne, & son Estat.

Requiert donc ledit Seigneur Roy de Nauarre tous les susdits Serenissimes & Illustrissimes Rois & Princes d'attester au Roy par leur seing propre, & à ce Royaume, & à la Chrestienté, si onques de sa part leur ont esté baillees lettres ou memoires, ou tenu propos, ou contre la dignité du Roy, ou contre le bien de son Estat, ou contre le deuoir en somme de treshumble & tre deuotieux seruiteur & sujet: Si iamais leur a esté parlé de faire la guerre au Roy de renoueller les troubles, ou de ruiner les Catholiques : Si onques ouuerture,

ou directement, ou indirectement, leur a esté faite sur la mort, ou en cōsequence de la mort du Roy. Et aux susdits Princes supplie tres-humblement ledit Sieur Roy de Nauarre, sa Maiesté qu'il lui soit permis d'enuoyer ceste sienne Declaration, contre les dessusdites calomnies; & la faire presenter par les Ambassadeurs mesmes de sa Maiesté, chacun endroit soy, à tous les Princes Chrestiens, amis & confederez de ce Royaume : afin que s'il a traicté chose semblable, le voyant protester le contraire, ils l'estiment Prince feint, de peu de foy, non veritable, & indigne au reste de leur amitié, que les dessusdits veulent rendre suspecte, & que de sa part il declare franchemēt desirer soigneusement entretenir, comme il pense l'auoir recherchee tres-raisonnablement.

Quant au Concordat, ils le dattent du quatorziesme iour de Decembre, mil cinq cens quatre vingts & quatre ; & y font present le Sieur de Segur, en qualité d'Ambassadeur du Roy de Nauarre : lequel estoit party d'Allemagne, repassé ez pays Bas, & des pays Bas en Angleterre, où il auoit seiourné deux mois & plus. Et nonobstant tout ce temps estoit rembarqué pour reuenir en France, auant le quatorziesme iour de Decembre. Audit Concordat ils introduisent les Ambassadeurs de l'Electeur Palatin, & du Prince d'Orage : l'un mort plus d'un an auparauāt, n'ayāt laissé qu'un mineur, pēdant la minorité duquel, le Duc Cazimir gouuerne l'Electorat ; l'autre assassiné



quatre mois deuant par vn Iefuite, suborné par leurs semblables : & tous les deux toutesfois s'obligent à se trouuer encor à ce mois de May en la ville de Basle, pour la cōposition des differens de la Religion. Adioustent que le Roy de Nauarre le dix-huitiesme d'Auril lors prochain, promettoit prendre les armes, assauoir qu'en ce mesme temps ils s'estoiēt resolus de les prédre : & en veulent deriuier la haine sur ce Prince; qui, tout enuironné qu'il est de leurs menees, ne bouge point. Le dattēt de Magdebourg, ville apartenāte au fils de Monseigneur l'Electeur de Brādebourg; & du pere ny du fils en ce Concordat ne se souuiennent point. Et c'est aussi vne Assemblée imaginaire; car ny en ce lieu, ny en autre ne se trouuera qui en aye esté tenu aucunemēt. Les titres au reste, & les qualitez sont si mal obseruees, les cottes aussi, & les contributions de deniers & d'hommes si mal proportionnees : tant d'absurditez & de chimeres, que c'est trop de honte, ou trop d'impudence d'abuser la France de chose si lourde : Mais chose profane, & digne du banc d'un Charlatan, & non de la chaire d'un prescheur, si ce n'est d'un Iefuite, de remplir de contes mesmes si mal digerez, l'oreille d'un pauvre peuple, ententif à ses deuotions : Car que peuuent-ils gagner sur oreilles plus accortes ?

L'Assemblée de Montauban ne merite plus de blasme, pour ce qui en est; ny plus de creâce, pour ce qu'en ont publié ceux de la Ligue. La verité est que le Roy faisant la paix l'an mil

cinq cens soixante dixsept, en intention qu'elle  
 fust exactement & diligemment executee, au-  
 roit delaisé en garde au Roy de Nauarre & à  
 ceux de la Religion, huit villes, pour l'espa-  
 ce de six ans, pendant que les animositez & de-  
 fiances s'esteindroient & amortiroient en ce  
 Roiaume. Que nonobstant ceste bonne inté-  
 tion, plusieurs qui ne demandoient que res-  
 susciter les troubles, qui depuis ont pris les ar-  
 mes avec les auteurs de ceste Ligue, trauer-  
 soient par tous moies l'execution dudit Edict  
 de paix, & donnoient à toutes heures & par  
 entreprises nouvelles, occasions de defiance;  
 tellement que les plaies qu'ils deuoient cicat-  
 triser, s'enaigrissoient & l'Edit de paix, que le  
 temps deuoit effectuer, s'en alloit reculant pas  
 à pas, & leur estoit retraché point apres point.  
 Que par la continuation de ces pratiques se-  
 roit aduenu, que durant lesdits six ans la paix  
 auroit esté interrompue diuersement, par sur-  
 prises, attentats, & mesme par guerre ou-  
 uerte, qui auroit duré vn an entier: dont se-  
 roiet sorties les Cōferences de Nerac & Flex;  
 tellement que les six ans, qu'on auoit prefix  
 pour la remise des places, n'auoient peu four-  
 nir, obstant les susdites interruptions, à l'ex-  
 ecution de l'Edit, & amortissement des animo-  
 sitez, qu'on se promettoit dans ce temps. Ce-  
 pendant que le Roy sollicité d'aucuns, deman-  
 doit que lesdites villes lui fussent remises, at-  
 rendu le temps qui estoit expiré: & ceux de la  
 Religion de l'autre part, voyant les causes du-

rer, ſçauoir eſt, les occaſions de deſſiances, & les animoſitez renouueller par les troubles, en faiſoient quelque difficulté: ſuppliâs tres humblemēt ſa Maieſté de n'auoir eſgard au temps prefix, mais au mal qui ſ'y eſtoit entreietté, en conſiderer pluſtoſt l'effect qu'il ſe feroit promis pendant les ſix ans, & au bout des ſix ans; aſſuoir pendant les ſix ans, l'execution & continuacion de la paix, & par conſequent, l'amortiffement de la deſſiance & animoſité; & au bout des ſix ans par cōſequēt la remiſe de ſes places, laquelle, les choſes eſtās en ceſt Eſtat, ſembloit n'eſtre conuenable à ceſte grace & equité de ſa Maieſté, dont premierement la conceſſion des places eſtoit procedee: veu que la cōdition par luy eſperce, n'auoit procedé cōme il eſperoit pendāt ce tēps. Sa Maieſté doncques conſiderant ces raiſons, & n'affectant pas le terme; aſſuoir la guerison du mal. & la reuñion de ſes ſubiets, trouua conuenable de ne preſſer ceux de la Religion à la rigueur. Et comme le Roy de Nauarre luy euſt remonſtré que ſeſdits ſubiets de la Religion auoient de grandes plaintes à luy faire, concernans l'execution de ſes Edits; leſquelles ouyes, & ſatisfaites, ſeroit plus aiſé de paruenir à la remiſe deſdites places: ledit Seigneur Roy conſentit par la bouche du Sieur de Belieure l'vn des principaux de ſon Conſeil d'Eſtat, à la requiſition dudit Seigneur Roy de Nauarre, l'Assemblée de Montauban, compoſee des Princes, Seigneurs, Gentils-hom-

mes, & personnes qualifiees de ladite Religion : & fut ledit Sicur de Belieure au nom du Roy en la ville de Montauban, tant que l'Assemblée dura, lequel ledit Seigneur Roy de Nauarre requiert pour tesmoin de ses actions, & desire estre ouy & creu en tout ce qu'il a cogné de ladite Assemblée. Ainsi ce n'a pas esté comme la leur, vne conuocation au desceu, & contre le gré du Roy; mais par le consentemēt & commandement de sa Maiesté : mesme que l'aiaint bien meurement delibéré, l'a iugee vtile & necessaire au bien & repos de son Estat. En ceste Assemblée fut dressé vn Cayer general des contrauentions & executions de l'Edict de paix, qui fut présenté au Roy à S. Germain en Laye, par Monsieur le Comte de Lual, & autres Deputez, avec tres-humble requeste de pouruoir aux doleances de seldits subiets de la Religion : Fut aussi promis par tous & chascuns, pour quelque attentat particulier qui se fist contr'eux, de n'en rechercher point la reparation par reciproque attentat, de peur que la temerité de quelques particuliers ne riettast ce Royaume aux troubles, cōme quelquefois on l'auoit ia cuidé voir : mais d'en faire plainte au Roy de Nauarre, lequel la feroit entendre au Roy; qui, selon son inclination assez cognue au repos de ses subiets, y scauroit pouruoir de remedes cōuenables: comme reciproquemēt le Roy de Nauarre leur promettoit d'embrasser leur cause enuers sa Maiesté, & la lui représenter soigneusement, lors qu'il



en seroit besoin, comme il auoit tousiours fait par le passé, afin que voyant qu'il entreprenoit leur cause enuers le Roy, ils fussent plus retenus dans les voies de la raison, sans penser aux extraordinaires, qu'ils auoient tentées par le passé, faute de recours & de support ailleurs. C'est tout ce qui se trouuera auoir esté fait en ladite Assemblée : rien plus que cela. Et le but en est tresuident, d'empeschier que des attentats particuliers ne prouint vn mal public, qui troublast la paix de ce Roiaume ; conformément à la Conference de Nerac tenue avec la Roine mere du Roy, où il en fut fait Article expres. Et ce qu'ils semēt de plus, est tout aussi vray que le Concordat de Magdebourg : où les Iesuites se sont oubliez d'auoir fait tuer le Prince d'Orange, qu'ils font reuenir en ieu cinq mois apres.

Et de fait, le Roy qui fut tresbien aduertý de ce qui s'est traité en ladite Assemblée, trouua leurs raisons si raisonnables ; que de son plein gré il leur accorda encores les villes de seureté pour quelques ans, voiāt tresbien que son Edict n'estoit pas executé comme il cuidoit. Et c'est vn des griefs dont les susdits de la Ligue vont s'escarmouchans contre le Roy de Nauarre, & protestent aujourd'huy contre sa Majesté mesme.

Certes pense le Roy de Nauarre que quiconque se voudra ressouuenir de ce qui s'est passé en ce Roiaume depuis treize ou quatorze ans, ne trouuera point estrange qu'on ait demandé

en paix quelques villes de retraite & seureté, & qu'on aye requis sa Maiesté, le terme venât à expirer, & l'Edict n'estât encores executé, ny les dessiâces amorties, que ces seuretez eussent à durer encore pour quelque temps, puis que le danger ne leur estoit leué: & puis que l'Edit de la paix, duquel depédoit leur vie & leur repos, ne se voyoit point encores en bon estat. Dira toutesfois fort frâchemét le dit Seigneur Roy de Nauarre, que la cause principale, pour laquelle outre la necessité cōmune de ceux de la Religion, il eust vn desir particulier de supplier tres-humblement sa Maiesté de les laisser encores pour quelque temps, fut la conspiration des dessusdits, de laquelle il attédoit l'effect à tous mométs; & outre laquelle, ceux de la Religion, desquels ils ont coniuré la mort, auoient besoin d'un abbry, tant que vieu leur fist la grace, que le Roy cogneust leurs fins à bon escient. Et de fait, la pluspart de ceux qui ont attenté durant la paix sur lesdites villes de seureté, que le Roy defauouoit tousiours, nous descouurent aujourd'hui suffisamment, à l'adueu de qui ils osoient troubler la paix, & entreprédre sur lesdites places, & autres de la Religion, ayans prins les armes à la suite de la Ligue. Et le dit Seigneur Roy de Nauarre supplie tres-humblement le Roy, de se ressouvenir des Aduertisseméts qu'il luy dōna peu de mois deuât ladicte Assemblée de Montauban, qui estoient bien suffisans pour faire penser deslors sa Maiesté à ses affaires: & en ce deffaut

l'admonnester à bon esciét de chercher ou retenir quelque seureté pour soi, auquel manifestement ils en vouloient.

QUE s'ils dient aujourdhui, qu'ils aient pris les armes, & saisi les villes de sa Maïeste, pour auoir aussi des villes de seureté, à l'exemple de ceux de la Religion contraire, comme aucuns ont voulu dire: Les prie donc tous ensemble ledit Seigneur Roy de Nauarre, de déclarer à la France quelle deffiance les y a meus: car certes malaisement pourroit elle deuiner quèlles causes ils en ont, D'auoir à se deffier du Roy, d'auoir à se deffier des Catholiques, d'auoir à se plaindre de haine ou d'iniures, ou de querelles de la part de ceux de la Religion. Certes on sçait trop que le Roy leur a commis ses forces & son royaume: Et s'il leur eust voulu mal, ils n'auroiēt tant de moien de faire mal qu'ils ont. On sçait aussi qu'ils ont comme partagé ce Roiaume entre leurs freres, & entre ceux de leur maison, par le moien des grandes Charges, & des grands Gouuernemens qu'ils ont, mesmes quelques vns aux despens des Princes de son Sang: qu'ils ont commandé aux armées, assailli les villes, donné les batailles, départi les Charges & en somme distribué la faueur du Roy quelques années, ainsi qu'ils ont voulu: Que iusques à ce iour, pendāt qu'ils ont fait semblant d'adherer à ses commandemens, ils ont esté honorez de la Noblesse & des bonnes Villes; y ont eu autorité, y ont asseuré

qui leur a pleu; tant s'en faut que par autruy, ou contre autruy, ils ayent eu besoin d'y estre gardez ou assurez. Ont au reste, & on le sçait bien, vuidé leurs querelles propres par les propres bras du Roy, executé leurs vengeances aux despens de son Royaume. Et si routes ces assurâces ne les rendent assurez, c'est la conscience qui a peur, qui leur ramentoit qu'ils ont abusé de la bonté du Roy; de l'autorité qu'ils ont de luy, contre luy-mesme: & ne pouuans s'assurer contre luy, que de luy-mesme, attendent sur sa personne, & enuahissent son Estat. Que s'ils dient qu'il leur faut des assurances contre ceux de la Religion en France; certes chacun sçait, que pour huiet places qu'ils retiennent, ceux cy ont autant de Gouvernemens entiers en ce Roiaume: Et qui cognoistra ceste inegalité (& n'y a si ignorant qui ne la voye) ne croira iamais que contre eux ils aient pourchassé des seuretez, ne croira iamais qu'ils aient craint d'estre attaquez de ceux qui iusqu'icy ont eu bien affaire à se deffendre, qui ne les pouuoient bleffer que couuerts du Roy, remparcz de son autorité, & armez de sa puissance.

A F I N donques que chacun cognoisse & la sincerité dudit Seigneur Roy de Nauarre, & leur feintise; & qu'à l'ombre de quelques seuretez qui luy ont esté donnees, apres tant de iustes desfiances, ils n'alleguent auoir eu besoin d'en demander contre luy, (eux qui n'eurent onques que des faueurs) qui ne font aujour-



d'huy mal, que par la trop grande confiance qu'on a prise d'eux, & la trop grande creance qu'on leur a donnee : *offre pour le bien* de ce Royaume( nonobstant l'inegalité de leurs conditions en toute sorte ( ledit Seigneur Roy de Nauarre, qu'il est prest de mettre és mains du Roy les villes de seureté qu'il a en garde, & qui sont en sa puilliance, sans attendre les deux ans de prolôgation, qu'il luy a pleu accorder; moyennât que les dessusdits posent les armes, remettât és mains du Roy les places qu'ils ont faiesies, pour en ordonner à son plaisir : *offre d'abondant*, nonobstant les susdites inegalitez tant de sa part, quede Monseigneur le Prince de Condé son cousin, pour leur leuer les scrupules( s'ils en ont ) & pour faciliter la paix; de remettre és mains du Roy les Gouvernemens qu'il luy a pleu leur dōner en ce Royaume, pour en ordonner à sa volonté; pourueu que les susdits cedent par mesme moyen entre ses mains les Gouvernemens qu'ils tiennēt. Tant s'en faut que, pour l'assœurâce qu'un chacun cognoist leur estre trop mieux deuē, ils importunent le Roy de nouuelles seuretez & nouveaux Gouvernemens, comme eux qui n'ont honte de capituler en leurs Articles, que les Gouvernemens de Normandie, Picardie, Lyonnois, Salusse, Mers, Thou, Verdun, &c. soient distribuez entre ceux de leur maison : c'est à dire, à biē parler, veu ce que ia ils en ont, la plus grande partie de ce Royaume.

Par ce que dessus pretend le Roy de Nauarre

qu'il se voit à clair qui d'eux ou de luy cherche plus de bien au pauvre peuple, le cōtētement du Roy, le repos & tranquillité de cest Estat. Et de fait, aussi seroit ce chose trop absurde, *Que le seruiteur de la maison voulust estre creu plus Zelateur du bien d'icelle, que l'enfant de la famille;* Que ces estrangers nous voulussent faire entendre qu'ils eussent plus de soucy de la conseruatiō de cest Estat que ceux en qui ce soucy est nay avec l'interest; Ces estrangers, di-ie, desquels la grandeur ne peut s'accroistre, que par la ruine & dissipation, & qui toutesfois n'ont point fait de conscience de le publier ennemy de cest Estat.

P R I E à ce propos ledit Seigneur Roy de Nauarre tous les Ordres & Estats de ce Royaume, comparer icy ( choses toutesfois non comparables ) les deportemens de ses predecesseurs en ce Roiaume, qui de pere en fils ont gardé ce nom de n'auoir esté iamais auteurs ny de foule au Peuple, ny d'iniure à la Noblesse; avec les deportemens des predecesseurs des Chefs de ceste Ligue, qui se trouueront auoir mis sus depuis qu'ils ont pied en France, la venalité des Offices de Iustice, les nouueaux subsides sur le pauvre peuple, dont ils ont tiré le suc & la substance, sous les Rois Henry & François deuxiesme, la confusion és Charges & Dignitez qu'ils ont les premiers transferez à leur plaisir, & vendus de main à autre: bref auoir accru la symonie en l'Eglise, & introduit la vente du temporel à leur profit, pour se

venger de leurs ennemis, sous pretexte d'heresie.

Quant à la personne, prie aussi tous les Estats de ce Roiaume, se souuenir ou s'enquerir s'il a iamais esté cause, quelques charges qu'il ait eu à soustenir, d'une surcharge sur le peuple: Au contraire, comment il gouuerne ce peu de subiects que Dieu lui a donné; qui se trouueront n'auoir esté surchargez d'aucuns impôts, tailles, ny subsides, nonobstant les grandes affaires qu'il a eu vn si long temps: Si onques il a fait outrage, ou de fait, ou de parole, en biés, ou à la personne, à Gentil-hôme quelconque, quoi que de plusieurs il ait esté offensé estrangement; pour quelque occasion que ce puisse estre, soit en sa maison, ou en ses pays propres: Si iamais il a fait tort pour rigueur qu'il ait receu de ceux de la Religion Romaine, à Prelat, Curé, Moyne, ou aucun du Clergé; au cōtraire s'ils n'ont pas tousiours esté bien-venus & bien receus aupres de lui, plus prest d'oublier les offences qu'on lui a fait, que ceux qui lui en ont fait, à lui en faire: S'il n'a pas tousiours rendu l'honneur & respect aux Cours souueraines & aux Officiers d'icelles, à tous ceux en somme qui portent la marque de Iustice; & si iamais on l'a veu ou violenter la Iustice par la force; ou bien denier la force necessaire, si elle a esté en lui, à la Iustice. Et quant aux autres parties de cest Estat, celuy qui à toutes n'a montré qu'honneur, amitié, & bien-vueillance, n'a iamais fait desplaisir, n'a desiré que plaisir;

ne fera aisémēt creü, ny estimé ennemi de tout l'Estat. Pour le regard de l'Estat en general, il ne veut nier que les guerres ciuiles n'ayēt apporté en ce Royaume vne grande confusion en toutes choses, pauureté au Peuple, diminution à la Noblesse, ruine au Clergé, mespris de Iustice, enfans de la guerre, & sur tout d'vne guerre ciuile, qu'il pleure en son cœur, & auxquelles il voudroit remedier, si possible estoit, mesme par son propre sang: Mais atteste Dieu, atteste sa conscience, atteste la France mesme, qui a les yeux assez clairs, la memoire assez fresche pour auoir bien veu, & pour bien se souuenir de tout ce temps; si iamais il est venu aux armes, que par le cōseil d'extreme necessité encores que de longue main il la peust preuoir & preuenir par la raison. Telsmoin l'Assemblée de Blois, suscitée par la presente Ligue, qui le declaroit banny de ce Royaume, & tous ceux qui font mesme profession, en cas qu'il ne changeast de Religion tout aussi tost: changement à luy, peut estre non difficile (s'il en auoit aussi peu qu'eux). Si iamais aussi il a dilayé de receuoir la paix, pour occasion particuliere que ce soit ( quoy que son degré soit tel, que ce qui luy est particulier, puisse estre à bon droit estimé comme public ) quand sa conscience a peu estre satisfaite, quand il a peu voir que ceux de la Religion dont il fait profession pouuoient seruir Dieu selon leur foy en tranquillité & repos: S'il a iamais rien demandé d'auantageux pour foy, creüe



creüe d'autorité, creüe de pensions, ou creüe de charges : s'il n'a au contraire mieux aimé se voir, comme il est encôres, sans autorité en son Gouvernement, qui luy deuoit estre rendue toute entiere par la paix : que de prolonger la guerre tant soit peu, que de dilaier d'une heure le soulagement du peuple par la paix, ou de troubler la paix, depuis qu'elle a esté faite, faute de iouir en plain effect de ce qui estoit promis pour son regard. Les Articles de la paix derniere soient pour tesmoins, & la Conference du Flex, en laquelle il se pouuoit seruir pour amender ses conditions du desir de feu Monseigneur de passer és pays Bas, où il estoit appellé par vne Ambassade generale des Estats dudit pays, qui l'en requeroit & sollicitoit tresinstamment. Cependant il aima mieux ceder lors son interest à l'accroissement de ce Royaume, que de differer ou marchader tant soit peu vn notable bié, qui en peust venir à son parry.

Il fit donc la paix, l'accepta à telles conditions qu'il pleut à sa Maiesté luy accorder, pour faciliter la conqueste dudit pays, & pour y aller luy-mesme, si sa Maiesté l'eust eu pour agreable. Ceux-cy, bons François, pour empescher que la Flandre ne soit iointe à la France, lors que les Ambassadeurs des pays Bas l'apporterent au Roy, à telles conditions qu'ils estoient prests à receuoir la loi de lui, prests à mettre dans leurs villes telles garnisons & tels Gouverneurs qu'il luy plairoit, pour l'en empescher, troublent son Roiaume, mutinent son

peuple, & cōmencent la guerre en pleine paix.

Quelle patience a eu le Roi de Nauarre depuis tout ce temps, quelques mescōtētemēs qu'il peust conceuoir du traictement, qui à la suggestion de leurs semblables, luy a esté fait, ie le laisse à la consideration de tout le monde: Reculé du Roy, sans autorité en son Gouvernement, non païé de ce qui luy estoit deu, & trop moins respecté en ses affaires, que le moindre Capitaine du Roiaume; Soit dit sans reproche Et pour simple verité de ses deportemens, s'il n'eust non plus resenty le mal du peuple & de toute la France, que font auourd'hui ceux de la Ligue, estât ce qu'il est, c'estoit pour la perdre entierement; mais il est François. & Prince François, membre de la France, qui sent ses douleurs, & se sent de ses playes. Diminution d'autorité, faute de faueur, interest particulier, n'aura iamais le pouuoir de le faire despiter contre soy-mesme: Chose propre aux Ligueurs, qui ne sont qu'antez legèrement en la France, & ressemblent aux iambes de bois & aux bras postices, qui ne sentēt rien quand le corps se brusle, & ausquels lon peut bien dōner l'exterieur, & non l'interieur, non le mouuemēt, ny le sentimēt de vrai François.

Sur ces remuemens qu'ils declarent & protestent estre directement contre luy, s'attaquans à sa personne, à sa vie, à son honneur, à sa conscience propre, les voyant armez se saisir des villes au milieu de son Gouvernement, enueloppé d'eux, irritans sa patience

incessamment; s'il n'eust respecté le Roy plus que son propre dâger, s'il n'eust affecté le bien de ce Royaume, l'esperoir d'une paix publique (si paix il peut auoir avec ces gens) plus que sa conseruation mesme; y auoit il apparence, ou y auoit il raison aucune de se contenir, cōme il a fait; mais tout lui est bon, pourueu que le peuple ait du repos; tout luy est valable, pourueu que l'Estat demeure en paix, le Roy obei, le Roy honoré, comme il doit estre, fust ce à son peril tout euidant, fust ce à son dommage irreparable.

Et c'est en somme, à quel titre le Roy de Nauarre a peu estre blasmé de ces beaux titres d'heretique, relaps, persecuteur de l'Eglise, ennemi des Catholiques, & perturbateur de cest Estat. Quant à la conclusion qu'ils en retirerent, par laquelle ils le declarent incapable de succeder au Royaume, & ont fait prendre à Monseigneur le Cardinal son oncle, le nom de premier Prince du Sâg & presomptif heritier: C'est certes le point qui plus leur touche au cœur, mais auq̃l iusques icy il a pēsé le moins, & qui luy est aussi venu tout le dernier. Se contente sur ce point ledit Sieur Roy de Nauarre de l'esperoir qu'il a, que Dieu gardera long tēps sa Majesté pour le bien de ce Royaume, & luy donnera lignee à tēps, au regret de tous ses ennemis: Se confie aussi qu'il a affaire à François, quelque soin qu'o ait rédu à les corrompre, qui sçauēt les droits, qui n'ignorēt les descētes, qui lui garderōt le rāg qu'il doit tenir: Se cōsole en

Dieu protecteur du droit, vengeur de la violence, qui voit les vns & les autres ; duquel le droit iugemēt n'est comme des hommes corruptibles, duquel l'arrest est certain, l'executiō invariable, sans qu'ils y puissent contreuenir.

Pour conclusion, & en ce qui concerne la Religion, declare ledit Seigneur Roy de Navarre au Roy son souuerain Seigneur, à tous Ordres & Estats de ce Roiaume, à tous Princes & Estats de la Chrestienté, Temporels & Ecclesiastiques ; Qu'il est, & sera tousiours tout prest de se soubmettre à la determinatiō d'un legitime Concile general ou national, comme il est porté par ledit Edict de Pacification de sa Majesté. En ce qui concerne cest Estat, & l'administration d'iceluy ; Qu'il acquiesce aussi tres-volontiers à ce qui en sera ordonné en vne legitime Assemblée des Estats de ce Roiaume, quād sa Majesté aura aggreable de la conuoquer. Cependant qu'il ne demande autre chose que de viure doucement, soubz le benefice des Edicts: Prest à employer sa vie, & ses moyēs, & de ses amis, pour la defense du Roy, de son Estat, & de tous les bons subiects de ce Roiaume.

Et d'autāt que ceux de la susdite Ligue l'ont pris pour subiect & pretexte de leurs armes, & veulent faire penser qu'ils n'en ont & n'en veulent qu'à luy, semans en leursdites Protections diuerfes calomnies, & le publiant nōmément en icelles, desireux de la mort du Roi, perturbateur de l'Estat, & ennemy iuré des



Catholiques, &c. Et outre tout ce que dessus, qu'il estime suffisant pour rendre chacun satisfait desdites actiōs: Suplie ledit Seigneur Roy de Nauarre, en toute reuerēce, le Roy son souuerain Seigneur (aux oreilles duquel il ne doute point q̄ ces calōnies ne soient paruenues) de ne trouuer mauuais (sauf tousiours l'honneur & le respect deu à sa Majesté) qu'il dit & pronōce en ce lieu, comme il fait presentement: Que ceux qui ont semé & publié lesdites calōnies, contenues eſdites Protestations cōtre lui, ont faulſemēt & malicieusement MENTI, exceptant ledit Seigneur Cardinal son Oncle.

Et d'abondant, pour dementir leurs calomnies par ses actions, Suplie aussi tres-humblemēt ledit Seigneur Roy de Nauarre, ledit Seigneur Roy son souuerain, de vouloir auoir pour agreable sa tres-humble fidelité & deuotiō en l'offre qu'il lui fait: C'est que pour le repos & soulagemēt de sa Majesté, & de son peuple, il lui plaise trouuer bon demesler ceste querelle entre les dessusdits & lui; sans y hazarder sa vie, qui seroit trop chere en ce Roiaume, & sans que sa Majesté s'en mette en autre peine. Esperāt que Dieu lui fera la grace de trouuer assez d'amis, tant en ce Roiaume, entre les seruiteurs de sa Majesté; que hors le Roiaume, entre les amis & alliez de sa Courōne, pour les luy rāger à la raison. leur faire recognoistre la treshumble recognoissance qu'ils doiuent audit Seigneur Roy son souuerain, & le respect & honneur qui luy doit appartenir

soubs luy.

Mais particulièrement, parce qu'il ne peut penser sans souspirs & larmes à la grâde effusion de sang de la Noblesse, qui pourra sortir de ceste guerre; à l'extreme pauvreté & desolation, qu'aura à souffrir le pource Peuple de ce Roiaume; au desordre & à la cōfution, qui par là s'introduira en tous estats: au lieu que la pieté, debonnaireté, & prudence de sa Majesté, sans ce remuement se preparoit, comme lon sçait, à reestablr cest Estat en sa premiere splendeur, prosperité, dignité, integrité, en toutes sortes: & sur tout aux blasphemés execrables que produit la guerre contre Dieu, & au débordement des vices qui courroient par la licence des armes. Pour abbreger ces miseres, que ledit Seigneur Roy de Nauarre voudroit racheter de son sang propre, il supplie treshumblement & de toute son affection sa Majesté, qu'il luy plaise ne trouuer estrange l'Offre que presentement il fait à Monsieur de Guyse, puis qu'ils l'ont pris à partie en leur Pretexte, & que ledit Sieur de Guyse commande en leurs armées: Que ceste querelle, sans que plus auant tous les Ordres & Estats de ce Royaume ayent à en souffrir, & sans y entremettre armee domestique ny estrangere, qui ne pourroit estre qu'à la ruine du pauvre peuple, soit vuidee de sa personne à la sienne, vn à vn, deux à deux, dix à dix, vingt à vingt, plus ou moins, en tel nombre que ledit Sieur de Guyse voudra, avec armes vsitées entre Che-

ualiers d'honneur. Et pour le regard du lieu, s'il le desire en ce Roiaume, supplie tres-humblement sa Majesté luy faire cest honneur de le vouloir nommer: & où il auroit ce Roiaume pour suspect, luy offre de se trouuer en tel autre lieu, hors cedit Roiaume, que ledit Sieur de Guyse voudra choisir, & qui soit de seur accèz, non suspect ni aux vns, ni aux autres. Honneur certes, veu la disproportion & inegalité de leurs personnes & degrez, tels que chacun cognoist, que ledit Sieur de Guyse deura embrasser & racheter par tous moïens: Heur aussi, que ledit Sieur Roy de Nauarre, & M<sup>o</sup>seigneur le Prince son cousin acheteront de leur sang tres-volôtiers, pour racheter le Roy leur souuerain Seigneur, des travaux & peines qu'ils luy brassent; son Estat de trouble & cōfusiō, sa Noblesse de ruine, tout son Peuple de misere & calamité extreme. Protestant ledit Seigneur Roy de Nauarre, deuant Dieu & en sa conscience, qu'il n'est meū à choisir ceste voie ni d'ambitiō qui soit en lui, ni de haine qu'il leur porte, ni de vengeance qu'il desire, ni de celle que de gaieté de cœur ils espousent contre luy. Le seul desir de voir Dieu seruir & honorer, son Roy hors de peine, cest Estat en paix, le peuple en repos, lui fait volontairement prédre le sort des armes. Le seul desplaisir, & le seul malheur qu'il se represente à tous moments de reuoir Dieu blasphemé en cest Estat, aux vagues & aux perils d'un naufrage, de reuoir ce pauvre

peuple en extremité & en miseres passees, desquelles à peine, s'il y retombe vne autre fois, pourra il se releuer.

S'asseure aussi & confie entierement le Roy de Nauarre, que le tout puissant, qui voit au dedans des cœurs, & qui preside aux sorts des armes, monstrera par le succès, à tout le monde & la sincerité & la iustice de sa cause, pour estre exemple à la posterité & à tous aages: Dieu, duquel il appelle l'ire, la vengeance, & malediction sur soi, s'il proteste faux, s'il a iamais rien conceu de mal contre la personne du Roy, contre son Estat, contre ses subiects de toutes qualitez, de quelque Religion qu'ils soient: Si iamais il a basti son dessein sur son tombeau, si iamais il minuta en son esprit violence aucune contre la Religion Romaine, ou contre les Catholiques. Dieu aussi duquel il attend la benediction, la bien-vueillance, & la faueur, contre ceux qui sans occasion lui pourchassent sa ruine; sous ombre de son nom, remuer ce Roiaume, renuersent tout ordre, ruinent le peuple, veulent despouiller le Roy de son Estat.

Fait à Bergerac le dixiesme iour de Iuin mil cinq cens quatre vingts cinq.

*Signé*

H E N R Y .

Et plus bas

*Lallier.*